

大乘阿毗達磨雜集論述記卷第二十三

唐京兆大慈恩寺沙門窺基撰

三根者謂未知欲知根。已知根。真知根。未知欲知根者。謂於加行道及於見道十五心剎那中所有諸根。此中顯示順決擇分所攝加行道及見道十五心剎那所有諸根是未知欲知根體。言諸根者。謂意根。信等五根。由未至等地所依差別故。如其所應有樂喜憂捨根隨一。憂根者。謂加行道時順決擇分後。於上解脫希求欲證愁感所攝。如是十根先未知真爲欲得知修習轉故名未知欲知根。已知根者。從第十六

見道心剎那已上。於一切有學道中所有諸根。是已知根體。所以者何。卽前十根從第十六見道心剎那。乃至金剛喻定。於如有學道中未有所應知境。曾所不知故。名已知根。具知根者。謂於無學道所有諸根。言諸根者。卽前所說九根除憂根。於無學道中說名具知根。具知者。謂阿羅漢等。此所有根名具知根。無學身中無有憂根。所應學無故。

由論云三根中初根取十五心。法師云。何意見道取十六心。初根取十五心耶。俱未曾得。同緣諦理。以行未圓。十六心方見道圓滿。名見道。已知重知。

名已知根。取第十六心已去。雖前三諦有重覆。知然諦未徧緣。未名重覆。故十五心是初根。第十六心已去。名已知根。於修道位得名。曾得未曾得。於見道位唯未曾得。見道十六心皆未曾得。以知重知名已知根。第十六心是忍智相覆行圓故。若言十五心爲見道。第十六心已去。名修道者。此小乘義。如五十七云。得初果時。初根亦滅。亦捨。彼論前云。未知根。乃至第三果。由數有者。約超越人爲論。此據次第人故。得果時捨初根。無學果捨已知根。亦爾。準知其憂根體。唯有漏。非正根體。論文云位。

中起故說之爲體。如身在下界修決擇分善其信等意三受可得是四善根體。此四善根皆是定法。憂根唯散唯下界非彼善根時入觀已出定隨出何善根。彼憂根緣涅槃起愁感遂以爲初根體。問曰。憂根在欲界遂爲初根體。思觀在欲界亦爲煖等初根體。釋曰。憂根居煖位不爲煖等正初根體。但以位起爲體非約實論。其思觀唯下界四善根在色界麤細相異不可以位中得起亦爲煖等體。若思爲初根體。思數非是根故。若如下十三卷文亦得思觀於煖等位起故得爲體。至十二卷當廣

釋言隨一者如小乘有異義。此中不然。如大論五十七二十二根中云。問幾根未至地可得答十一。謂信等三無漏意及喜捨以樂隱故不說。其下引經中亦兼明有樂若爾有十二根。根本初二靜慮有十八。除男女憂苦四根。第三禪十七前中除喜。第四禪十六前中除樂。空識無邊處無所有處有十一。前中除五色。此並漏無漏合說。非想地有八。前中除三無漏以不斷惑唯有漏說。若餘處類斷惑無漏合說。通漏無漏有十。以義準除未知當知根見道無故。此十根中九根除憂。近上地多少故

言隨一。此中唯有說意地諸根成果非五識故。不取苦根。無學雖有義名無漏亦不取也。此中已知根謂於修道乃至金剛定。其此根亦具十根。若以此文第三果人亦有憂根。如大論五十七云。如經言於上解脫希求憂感乃至別解希求等四字。已云此中預流一來於一切種皆圓滿。故建立憂根若不還果。雖有希求而無憂感。不立憂根。唯善法欲故。知第三果人無憂根。此論言已知根者。以初二果亦入已知根通法爲論。其實第三果人無若。有憂者云何憂根離欲界時斷。有義憂根能取三

果。卽超越人義說。第三果有非據實。此下界人非上界。又論主據學無學相對論。已知根故有憂根。非論實體。其餘信等諸有漏者。亦同憂根。取無漏者不取。何故不取者。何故不同初根。第二故通色界繫。又初根加行故。唯言加行道。以有憂根亦通資糧道。故思之。論菩薩三根如五十七云。於勝解行地建立初根。此據通佛法實見道無閒道未至十六心。豈不名初根耶。於淨增上意樂地建立第二根。此據十地皆名增上意樂。此意樂如第十三卷會於如來地立第三根。此根中應說見道修道

有漏無漏

復次依止修道分別修義。謂依初靜慮地現修道時亦修欲界繫所有善根。於彼得自在故。如依初靜慮地修欲界善根。如是依一切上地現修道時皆能修習下界下地所有善根。於彼得自在故。當知此中所說義者。謂依止上地現前修習道時。下界下地所有善根雖不現前亦皆修習。何以故。於彼得自在故。自在者。謂轉增勝現行自在故。

上修下當得下地亦修上。無色見道傍修等是此義。依止修道分別修義者。若依小乘見道依上得

修下。下未曾得故不得修上。修道依下地道緣上地境得修上地修。隨所斷惑地皆得亦得修下地。且如未至禪發觀斷初根本惑時修上二地善根。謂中間及根本一切上地修法。如理準知。若依此文。唯論修道言依上修下所有善根。不云見道。若此文以爲真實理。全異小乘故。修道不同故。見道準知可解。若隨他小乘義。以此大乘無者。此論唯據一邊。又此修非生上界者。唯身在下界者得。若生上界。聖人不退還。故何須自在而修下善。唯第三果人得諸靜慮已修道修諸善根。其初二果如

佛地論伏惑得第四禪起無漏道滋變易生死亦得上界諸定。何故不修下地善根。且釋不得其第三果久來離欲成就上地修道亦於下法自在得修習。其初二果未離下地欲於下地善法現行自在。在何用修習。若爾第三果人身在下地不現行起下地善根耶。答起。但入修道觀時令下地善法種子增長令得自在。初二果人修道上地未得自在起故。其修道未見不知是無漏爲當有漏。若無漏修道亦得修習。見道何故不修。如前準知大乘唯令種子增本識。居見道位有五地善法種子何故

不得修。又修道隨斷惑地如發二禪發觀斷空處惑何故不修上。若約此道理修道不得修上。今此中唯約自斷惑修語。不約發觀斷他地語。

究竟道者。謂依金剛喻定。一切麤重永已息故。一切繫得永已斷故。永證一切離繫得故。從此次第無閒轉依證得盡智及無生智。十無學法等。何等爲十。所謂無學正見。乃至無學正定。無學正解脫。無學正智。如是等法。名究竟道。云何名一切麤重。略說有二十四種。謂一切徧行戲論。麤重領受。麤重煩惱。麤重業。麤重。異熟。麤重煩惱。障。麤重業。障。麤重。異熟。障。麤重。

蓋麤重。尋思麤重。飲食麤重。交會麤重。夢麤重。病麤重。老麤重。死麤重。勞倦麤重。堅固麤重。麤麤重。中麤重。細麤重。煩惱障麤重。定障麤重。所知障麤重。如是二十四種略攝一切麤重。一切徧行戲論麤重者。謂執眼等諸法習氣。無始時來依附阿賴耶識相續不斷。卽此名爲戲論習氣。從此習氣眼等諸法及名言執數數生起。領受麤重者。謂有漏諸受習氣。煩惱麤重者。謂煩惱隨眠。業麤重者。謂有漏業習氣。異熟麤重者。謂異熟無堪能性。煩惱障麤重者。謂猛利長時間。煩惱性業障麤重者。謂能障道無閒等業障性。異熟

障麤重者。謂與諦現觀相違。那落迦等自體得。蓋麤重者。謂能障礙善品方便。盛貪欲等性。尋思麤重者。謂能障礙欣樂出家欲。尋思等性。飲食麤重者。謂極多少食於方便行無堪任性。交會麤重者。謂兩兩形交。身心疲損性。夢麤重者。謂睡眠所發身愆劣性。病麤重者。謂諸界互違所發不安隱性。老麤重者。謂大種衰變所起不隨轉性。死麤重者。謂臨命終時諸根亂性。勞倦麤重者。謂遠行等所作支體頓弊性。堅固麤重者。謂無涅槃法者。如其所應所有戲論麤重等性。麤中細麤重者。謂欲色無色所有麤重。如其次第。

煩惱障麤重者謂聲聞獨覺菩提所治定障麤重者謂九次第定所發功德所治所知障麤重者謂一切智性所治如是隨其所應一切麤重永已息故名究竟道如說如是行者心解脫圓滿慧解脫圓滿身麤重永息。

問二十四種麤重分之爲七如文可解。

由成就念爲因故於最初門善調善護善防善覆極善修治謂於眼所識色乃至於意所識法亦爾。

此中如善調等四句或有以念處四法一一相配或可一一念處皆有此四善調等此中意言始修

行者最初以念爲因於六塵中一一塵上皆能善調善護善防善覆勿令於此六塵而生忘念起諸過失。

繫得者謂於麤重積集假立繫得性。

有大論文未見繫得如實論一切麤重有漏諸法皆有麤重積習名繫得性若以縛諸眾生但以煩惱爲縛非餘有漏若取強邊唯取煩惱若據實論諸有漏法皆名繫得。

離繫得者謂於麤重離散假立離繫得性。

離繫得者卽諸涅槃之上假立翻繫得卽是。

金剛喻定者。謂居修道最後斷結道位。所有三摩地。此復略有二種。謂加行道攝。無閒道攝。加行道攝者。謂從此已去。不爲一切障所礙。而能破一切障。無閒道攝者。謂從此無閒盡智無生智生。又此三摩地無閒堅固。一味徧滿。云何此金剛喻定名無閒。謂此相續流非世閒行所閒缺故。堅固者非一切障所壞。能壞一切障極堅猛故。一味者無分別性純一切故。徧滿者緣一切所知法共相真如爲境故。爲顯此義。薄伽梵說如大石山無缺無隙無穴。一段極善圓滿十方猛風所不動轉。

金剛喻定文中爲加行道。如佛地論師入地以去無加行。此云何通。二會。一通小乘金剛喻定說。故有加行道。以小乘人有漏道爲加行道故。二卽菩薩無有漏。加行智非無遊觀無漏而爲加行道。金剛喻定義。一刹那鄰生無生智者。是加行道取何者。取鄰次加行無漏不取遠前。又金剛定義。一刹那云何金剛藏。而是金剛喻定菩薩。且釋云。見道名一刹那起不多時相續。非如修習地有分齊。作行有多時數出入觀。見道一觀便斷煩惱事。究竟故名一刹那。金剛喻定亦復如是。義準可知。問。又

金剛喻定爲加行道者以能永伏現令不起義亦名金剛定剋實無閒道斷此中加行道取末後加行道非餘若無閒道生惑滅盡智應與無閒俱答曰然仍不說已未全淨故於解脫道方說至下更可解若唯一刹那名金剛定云何前定須名無閒由與加行合說故非此無閒道一念名無閒或無閒後謂菩提非中間故又金剛喻定斷諸煩惱人法種子等分齊至斷惑處當分別及智起分齊勘佛地論第三卷

無閒轉依者謂已證得無學道者所有三種轉依何

等爲三謂心轉依道轉依麤重轉依心轉依者謂已得無學道證得法性心自性清淨永離一切客塵隨煩惱故名爲轉依卽是真如轉依義

心轉依法師以正智是心真如亦名心如說智及智處皆名爲般若此亦如是至第十一卷當廣釋正智爲真心故真如之性亦名爲心

道轉依者謂昔世閒道於現觀時轉成出世說名有學餘有所作故若永除一切所治永離三界欲時此道自體究竟圓滿立爲轉依麤重轉依者謂阿賴耶識一切煩惱隨眠永遠離故名爲轉依

麤重轉依謂擇滅道。謂正智下轉依等。當別釋三六轉依作四句等義。

盡智者。謂由因盡所得智。或緣盡爲境。所以者何。由有盡故而起此智。名爲盡智。或緣盡爲境。故名盡智。此義意言於此位中。由永斷集。令無有餘所得智。名盡智。或緣因盡爲境。故名盡智。無生智者。謂由果斷所得智。或緣果不生爲境。所以者何。由有無生故。所得智名無生智。或緣無生爲境。名無生智。此義意言由有當來一切苦果。畢竟不生。法性故而得此智。雖緣餘諦爲境。亦名無生智。或緣苦諦無生爲境。故名

無生智。

盡無生智。通大小乘說。漏盡人身中得名盡智。盡智十智性。緣漏盡涅槃故。盡智六智性。無生智亦然。六智者。謂盡智無生智。世俗智法智。類智及與滅智。此上法師引薩婆多云。今大乘思之不然。其類智不緣涅槃。如第九卷釋言。六智皆緣涅槃者非也。若如三心見道說第三雙觀。此文說類智。此智緣如前二心類。未必類智唯緣法智生。若以此義類智亦得。據實義者。此第三心非十六智中類。但忍法智收。以緣如故。以總名說。若爾類智不緣

涅槃非盡智收。有義法智滅智後得智爲盡無生智。用前智作世俗理不得緣類智還同前判。以是義故並非緣如。以起分別名言故。如大論六十九云。盡無生智當知唯於漏盡中生。若不分別盡及無生。謂我已得諸漏永盡。我未來苦後不當生者。唯是無漏。唯出世間。若作如是分別者。唯是無漏世出世間世俗智攝。是未曾得是阿羅漢相續中生。且據羅漢佛亦如是。又世俗智小乘無學等亦有體。是世俗智緣涅槃。亦得如佛世俗智體。非世俗緣世俗故名世俗。亦不緣涅槃。約小乘人唯有

五智除類智。隨小乘義有六智。若佛身中唯有四智。除世俗及類智。盡智無生智。有是不是。據是者不違。如佛地論第三卷釋漏盡通力云。若說漏盡相續中有四智所攝。若說彼緣漏盡涅槃爲境。多分攝在大圓鏡智平等性智。通力既爾。智準可思。無生智中文有二。或字。至下釋論卽分出前十智性者。後六智性者。無生智既爾。盡智隨知。

又十無學法。當知依止無學戒蘊。定蘊。慧蘊。解脫蘊。解脫智見蘊說。何以故。無學正語正業正命。是無學戒蘊。無學正念正定。是無學定蘊。無學正見正思惟。

正精進。是無學慧蘊。無學正解脫。是無學解脫蘊。無學正智。是無學解脫智見蘊。

十無學法中五分法身如常分別。唯慧蘊及智見蘊何異。義曰。慧蘊謂觀於事智。智見蘊謂觀理慧。此不見文。又釋慧蘊謂緣如理解脫。智見謂緣佛身一切無漏解脫法。此但以多復次釋。不見論文。自餘出體等門。易如前八道支中會釋。五分法身十無學法相攝道支。義如前會。

復次道諦有四行相。謂道相如相。行相出相。何故名道相。因此尋求真實義。故所以者何。由此聖道是諸煩惱故。所以者何。一切煩惱皆不如理。道能除此。是故名如。何故名行相。善能成辦。心令不顛倒。故所以者何。心不覺悟。真實道理於無常等法起常等顛倒。善能修治。此顛倒心。令離顛倒。覺真實義。是故名行。何故名出相。趣真常迹。故所以者何。由此聖道能趣出離。究竟常迹。是故名出。

道四行中道相出相有何差別。

問。於諸諦中有十六行。皆通世間及出世間。世出世行有何差別。答。於所知境不善悟入。善悟入。性差別。

故有障無障性差別故。有分別無分別性差別故。所以者何。於諸諦中無常苦等十六世間行於所知境界不通達。眞如性故。煩惱所隨眠故。依名言門起戲論故。如其次第。不善悟入。有障礙。有分別。出世間行。與此相違。善悟入。無障礙。無分別。由此道理。世出世行互有差別。云何出世行無有分別。而善悟入所知境界。由彼諸行現在前時。雖復現證見無常義。然不依名言戲論門見此。是無常義。如無常行於無常義。餘行於餘義。隨其所應亦如是。

問。十六行中下文以加行智爲分別。其後得智亦

分別爲十六行。豈不相違。義曰。若以有漏無漏門。無漏者無分別。後得智雖語言仍無分別收。加行雖無語。仍是分別攝。若以名言非名言門。正智非分別。後得分別收。若以此義。加行應是無分別。以無言故。但以有漏門是分別收。攝論云。加行智如瘧求受塵。此非語言。豈不相違。如前類釋。更有後得智妨思之。問。戲論亦二重。如前可知。此中依初入聖前十六行說。名有隨眠等。不爾。無學身等。豈不作有漏十六行前。

決擇分中法品第二

云何法決擇。

科品次第如初卷解此品有二。初問後答。

答中有二。初明三乘通法。後明菩薩別法。復次何因緣故。十二分聖教中方廣分名菩薩波羅蜜多藏耶。下是初文有三。初因前所詮諦理辨能詮教法。次如是三藏爲誰所行境耶。下乘前所辨以顯能所緣行法。後云何於諸法中法善巧云何義善巧合辨文義等善巧。初中有二。初明十二分教後明三藏相攝等義。

法者謂十二分聖教。何者十二。一契經。二應頌。三記

別。四諷誦。五自說。六緣起。七譬喻。八本事。九本生。十方廣。十一希法。十二論議。

初中初標列後別釋。

契經者。謂以長行綴緝略說所應說義。問何故如來不廣開演所應說義耶。答如來觀察十種勝利略說諸法。謂易可建立。易可宣說。易可受持。恭敬法故。菩提資糧速得圓滿。速能通達諸法實性。於諸佛所得證淨信於法僧所得證淨信。觸證第一現法樂住。談論決擇悅智者心得預聰明英叡者數。云何名爲易可建立。諸說法者以無量門安立開示所應說義。今

以略言易建立故。云何名爲易可宣說能以少言詞
廣顯大義故。如說能令心住等住。如是廣說易可受
持者。令能聞者易受持故。恭敬法故。菩提資糧速得
圓滿者。了知佛法深慧所證。卽於是法深生敬愛。由
敬愛門信等資糧速圓滿故。速能通達諸法實性者。
卽由敬法方便力故。令其智慧轉復猛利。漸能通達
諸法實性。於三寶所得證淨信者。由悟聖教妙善建
立於說者等淨信生故。觸證第一現法樂住者。於諸
如來密意深義猛利加行正思量已。獲得增上證歡
喜故。談論決擇悅智者。心者善能開發深隱義故。得

預聰明英叡者數者。廣大美稱流布十方故。當知後
二種合爲一勝利。

契經中有二。初辨。後問答。脩多羅中唯言長行者。
如涅槃經云。始從如是。我聞乃至歡喜奉行。皆是
脩多羅。并偈頌等。是未必唯取長行。與此文違。彼
涅槃約通相脩多羅。此論約別相脩多羅。理實無
違。智度論此論同。大論二十五同此。此中脩多羅
并三藏中脩多羅。何者寬狹。義曰。若以名爲寬狹。
三藏脩多羅。攝十二部經。多故名寬。十二部經。脩
多羅。唯一法故名狹。若以體論寬狹。此中脩多羅

攝十二部經故寬彼脩多羅不爾。又以此義此中脩多羅攝三藏。三藏中脩多羅不攝三藏等盡。

應頌者卽諸經中或中或後以頌重頌。又不了義經應更頌釋故名應頌。

應頌中唯有中後而無先頌者。法師判是此中收有義諷頌中收。

記別者謂於是處聖弟子等謝往過去記別得失生處差別。又了義經說名記別。記別開示深密意故。諷頌者謂諸經中以句宣說或以二句或三或四或五或六。

問諷頌中不說一句者。一句乃成長行非偈。成頌二句爲顯二句亦得成頌。言三句意未必欲取三句成。但顯六句一頌半亦成。若爾言三顯六。何故復有六句之言。有解言三句顯三句亦得成頌。又釋言三但顯於下六句成頌。復下言六句者爲顯十二句成頌。不欲取六句前三句中已顯六故。若爾六句已上十二句已上豈不成頌耶。答曰亦成。此中但約少法爲例。多頌並成問。大論與此同汎作法也。

自說者謂諸經中或時如來悅意自說。如伽陀曰。若

於如是法發勇猛精進靜慮諦思惟爾時名梵志。

自說中無問自說既得成經。無答自問亦應成經。釋曰。無問自說是佛說。故成經。無答自問異教主。非成經。若有異教主說。佛與問答者。成經。唯有無問自說。不有無答自問。

緣起者。謂因請而說。隨依如是。補特伽羅起如是說。故又有因緣制立學處。亦名緣起。謂依如是因緣。依如是事。乃至廣說。譬喻者。謂諸經中有比況說。爲令本義得明了。故說諸譬喻。本事者。所謂宣說聖弟子等前世相應事。本生者。謂宣說諸菩薩行本相應事。

本事中依智度論。宣說佛及弟子本。隨形六道。爲猿猴等事。本生中宣說佛及弟子實報身行菩薩行事。此中本事約弟子。本生約自身。義局且別說也。

方廣者。謂菩薩藏相應言說。如名方廣。亦名廣破。亦名無比。爲何義。故名爲方廣。一切有情利益安樂所依處。故宣說廣大甚深法。故爲何義。故名爲廣破。以能廣破一切障。故爲何義。故名爲無比。無有諸法能比類。故此方廣等皆是大乘義。差別名。由與七種大性相應。故名大乘。何等名爲七種大性。一境大性。以

菩薩道緣百千等無量諸經廣大教法爲境界故。二行大性正行一切自利利他廣大行故。三智大性了知廣大補特伽羅法無我故。四精進大性於三大劫阿僧企耶方便勤修無量百千難行行故。五方便善巧大性不住生死及涅槃故。六證得大性證得如來諸力無畏不共佛法等無量無數大功德故。七業大性窮生死際示現一切成菩提等建立廣大諸佛事故。希法者若於是處宣說聲聞諸大菩薩及如來等最極希有甚奇特法。論議者若於是處無有顛倒解釋一切深隱法相以無顛倒一切法相論議經等深

隱義故。如是契經等十二分聖教三藏所攝何等爲三。一素怛纜藏。二毗奈耶藏。三阿毗達磨藏。此復有二。一聲聞藏。二菩薩藏。契經應頌記別諷頌自說此五聲聞藏中素怛纜藏攝。緣起譬喻本事本生。此四二藏中毗奈耶藏并眷屬攝。緣起者宣說有因緣建立諸學處。是正毗奈耶藏攝。譬喻等三。是彼眷屬攝。方廣希法。此二菩薩藏中素怛纜藏攝。方廣者文義廣博。正菩薩藏攝。希法差別難思廣大威德最勝相應。是故亦是菩薩藏攝。論議一種聲聞菩薩二藏中阿毗達磨藏攝。

三藏相攝等中分三。初三二藏相攝。次建立三藏所因。後法蘊之量。

問藏攝中如此。若聲聞菩薩合論。七經脩多羅藏。如文可知。若約顯揚大論二十五。十經是脩多羅。除緣起論議。何以十經七經有相違耶。答義曰。彼十經者。說本事等自性故。此七經者。本事等三。毗奈耶眷屬故。如論文可知。論文契經乃至自說。此五聲聞脩多羅藏收。據實菩薩亦有。法師云。以聲聞乘由根鈍故。廣明三學是契經。如是等隨增說。是聲聞脩多羅。有義且以二藏相對明脩多羅。方

廣等。二是菩薩脩多羅。契經等。五是聲聞脩多羅。據實菩薩藏中亦有前五。聲聞自藏亦明三藏。十二部。望方廣等亦未有故。三十八云。方廣一經。唯菩薩藏。餘十一分。有聲聞藏。此約眷屬。彼約自性。非相違也。勘何所以。毗奈耶自性可知。眷屬說餘三。如本事。本生說過去本幻術等。因緣事說過去等。本因緣生事故。眷屬毗尼收。若顯揚十經者。不別分聲聞菩薩三。合法爲論。彼論毗奈耶唯一經者。以說自性故。此論以希法爲菩薩藏。大論二十。五以希法爲聲聞藏者。以希法通說聲聞未曾有。

法故亦得聲聞藏收方廣不然唯大乘有。

問。何故如來建立三藏。答。爲欲對治疑隨煩惱。故建立素怛纜藏。爲欲斷除所化有情於種種法發起疑惑。宣說契經。應頌等故。爲欲對治受用二邊隨煩惱。故建立毗奈耶藏。二邊者。謂欲樂行邊。自苦行邊。對治受用者。遮彼受用畜積等故。開彼受用百千如法衣服等故。爲欲對治自見取執隨煩惱。故建立阿毗達磨藏。處處廣釋諸法差別如實相故。復次。爲欲開示三種學故。建立素怛纜藏。所以者何。要依此藏所化有情解了三學。由此藏中廣開三種所修學故。爲

欲成立增上戒學。增上心學。故建立毗奈耶藏。要依此藏。二增上學。方得成立。所以者何。廣釋別解脫律儀學道聖教爲所依止。方能修治淨尸羅。故依淨尸羅。生無悔等。漸次修學。心得定故。爲欲成立增上慧學。故建立阿毗達磨藏。要依此藏。增上慧學。方得成立。所以者何。由此藏中能廣開示簡擇諸法巧方便。故復次爲欲開示正法義。故建立素怛纜藏。依止此藏。文義易了。故爲顯法義。作證安足處。故建立毗奈耶藏。依止此藏。能修二種作證學行。故毗奈耶是法義。作證安足處。安足處者。是所依義。爲令智者論議。

決擇受用法樂住故建立阿毗達磨藏。依止此藏諸有智者更相問答論議決擇受法樂住。由此藏中以無量門開示諸法自相共相等真實法性故。如是三藏具有八萬四千法蘊。謂依聲聞乘尊者阿難常所受持。問一一法蘊其量云何。答。十百之數是法蘊量。十百者千數義。若爾何故不直說是千數耶。爲顯建立一一法蘊千數。因故所以者何。初一數增以成十數。十數復增以成百數。千等數量。因十百數方得成立。謂十百名千百千名百千百百千名俱抵如是等一切後後數位。決定用此十百二數隨一爲因。是故

此中唯總取十百兩數以用建立一一法蘊。由此數量總計八萬四千法蘊。成八俱胝四十洛叉。

八萬四千法蘊中。如賢劫經廣辨。始從修習行法波羅蜜多。乃至最後分布佛體波羅蜜多。合三百五十度。皆有六到彼岸。合計二千一百對貪瞋癡及等分煩惱。一一皆有二千一百。四法乘之。有八千四百。復以此數法對四大六衰。亦名無義所生過失。一一皆有八千四百。以十法乘合。有八萬四千。論云百千名百千者。梵語云一洛叉。卽百千也。此土大數之名。然合計當一億百百千一俱胝者。

俱抵謂梵語卽千萬也。卽合計是京就別號亦名百億。其八萬四千法蘊。一一以千乘之。卽八俱胝四十洛叉。計當八千四百萬。大數乘之。當八京四兆。細算之。可知。論云以千乘之。其本但以十百二數之。今就此言。故知千也。此如佛地論亦明。

如是三藏爲誰所行境下。第二段乘前所辨以顯能所緣行法中分二。初明資糧位。後辨四種道理。下加行位。初中有三。初辨二非法能緣之體。次辨於法能緣行相等有所緣等。是後別顯於法所緣差別。

問如是三藏所攝法爲誰所行境耶。答是聞思修所生諸心心法所行境界。所行者是所緣義。

論云三藏聞思修所行境。此大論同。彼說修慧緣教說故。

△第二辨於法能緣行相等中有二。初標辨。後顯成。復次因此所緣相依心法。建立有緣等義。

論云此顯名句文身所攝經等教法爲所緣境。如此文教體唯以名身爲體。如初卷教詮章中辨。此隨相語。據詮有差別語。

如經中說諸心心法有緣有行有依相應。彼於此法

爲何所緣謂契經等。此顯名身句身文身所攝契經等教法爲所緣境。作何等行。謂蘊等相應義。此顯依蘊等義所起言教法。彼心心法作此行相。何所依止。謂他表了憶念習氣。此顯正說法時用他表了爲所依止。如說從他言音故。次此後時憶念爲所依止。如所聞已隨念數習故。復此後時習氣爲所依止。由後串習習氣力强。雖離憶念而似彼顯現故。何等相應。謂互爲助伴。於所緣行平等解了。由心心法互爲助伴。於契經等所緣境界。以蘊等相應義行平等解了故。

顯成分二。初引經四義後別釋之。
云何於法所緣差別。

於法所緣差別有二。初問後答。

若略說有四種。謂徧滿所緣。治行所緣。善巧所緣。淨
惑所緣。

答有二。初標後釋。此乃前卷所明止觀行別釋中。初徧滿所緣。定止觀體後之三。種明正修行。修行分三。如次乃是初中後修。從次方入加行位。故後加行位中有四道理。四道理加行位之方便。四尋思。煖頂位。四如實智。忍第一法。後五瑜伽通前方。

便根本二。加行位能入見道。

徧滿所緣復有四種。謂有分別影像所緣。無分別影像所緣。事邊際所緣。所成就所緣。有分別影像所緣者。謂由勝解作意。所有奢摩他毗鉢舍那所緣境界。勝解作意者。一向世間作意。無分別影像所緣者。謂由真實作意。所有止觀所緣境界。真實作意者。一向出世間及此後所得作意。

有分別影像緣等論文中云。一向世間謂勝解作意。法師云。既云勝解作意。明知是有漏見道已前勝解行地。如大論二十云。有分別影像者。謂乃至

由三摩呬多地毗鉢舍那行觀察簡擇極簡擇徧尋思伺察乃至爲六行。於此所知事知功德過失。大論此文卽有分別影像通漏無漏。以簡擇如大論八十三卷釋唯無漏。此論有分別是有漏。大論有分別與此不同。此據見道前語。彼約通地前後語。無違。問論云。無分別影像。謂一向出世間及此後所得作意。如此文卽唯無漏。如大論二十六云。無分別影像者。謂修觀行受取如是影像已。不復觀察簡擇。乃至徧伺察。以九種奢摩他行寂靜其心。勘與此論相違。此論第十卷及大論第四十中

釋九種定皆有漏始修行者所爲大論以有分別爲影像觀此論據有漏者彼論據無漏者據實通漏無漏又極簡等大論謂無漏二十六無分別觀不復修習。如有分別影像通無漏名有分別如是無分別得有影像緣四慧無分別而爲九種定。二論不同有漏無漏異者有四種慧通漏無漏如三十卷解四慧中不言無漏亦得通漏無漏下三門中相似有漏並如九種定會法師引西方無漏觀無影像家釋此文亦然能去內心有所緣慮相是心家影名無分別影像緣又無他分別影像名無

分別影像若作此釋大論二十六云卽此無分別影像亦名影像乃至亦名三摩地門乃至亦名光影云何言無他分別影像佛地論三家釋像待問錄之又無分別中既有影像之言明知非無分別智若爾云何言內真證智後得智有二分一反緣理二緣事反緣理者此是不論無分別智

事邊際所緣者謂一切法盡所有性如所有性盡所有性者謂蘊界處爲顯所知諸法體事唯有爾所分量邊際是故建立蘊界處三如所有性者謂四聖諦十六行真如一切行無常一切行苦一切法無我涅

槃寂靜空。無願。無相。由如是等義差別門了所知境。故名如所有性。或以諦門了所知境。謂卽前所說諸蘊界處隨其所應了知是苦乃至是道。或以行門了所知境。謂一一諦各由四行及一切法無有差別皆真如行。或以諸法卽陀南門了所知境。謂諸行無常乃至涅槃寂靜。或以解脫門了所知境。謂空無願無相如是等。

邊際如大論二十六云。皆言如所有性盡所有性。與此文大同。如所有性彼唯真如。此兼有餘行。不同會之。大意盡所有緣事。如所有緣理。更有釋待。

問一切行但言苦無常無我不言於空問。所作成就所緣者。謂轉依已得轉依者。無有顛倒所緣顯現故。如是轉依不可思議。

所作成就此文謂轉依。如大論二十六云。勘彼相違。鈔文所作成就者。謂於定慧修習多修習故。諸緣影像所有作意皆得圓滿。圓滿此故便得轉依。一切麤重悉皆息滅。得轉依故。超過影像卽於所知事有無分別現量智見生者。依此文至果定慧圓滿得轉依卽無影像。云何前言有無分別二種影像皆通無漏。若以此義應彼因中無漏亦有影。

像果中無漏卽無影像。應是正義。且釋起有漏執。影像名影像。非無漏心。因有果無影像。及果後得亦無影像。勘二十六鈔也。問彼下文云有分別影像卽是此中毗鉢舍那品。若說無分別影像卽是此中奢摩他品。事邊際卽是一切事真實事。所作成辨卽是因果相屬事。次下頌中常於影像靜慮卽謂有無分別影。此二皆說爲靜慮。又此論云有分別影像卽謂勝解作意。所有奢摩他毗鉢舍那。何以此三論文不同。論文三解脫門中有五文不同。如瑜伽五十五會。

前說如所有性中有十六行及三解脫門。如是二種更互相攝。問空攝幾行。答二。謂空行。無我行。問無願攝幾行。答六。謂無常行。苦行。苦因行。集行。生行。緣行。由彼於三界無所願求。故問無相攝幾行。答八。謂滅道八行。由彼不能作諸相故。

空攝二行。此一切論同。無願攝六行。無相攝八行。法師云大論二文。第三十卷不見尋伺地解無願收六。與此論同。列六名并有等字。等者等取道下四第八帙中無願謂十緣取道下四。無相有四會云。若論文無相唯攝滅下四者。以無十相名無相。

十行名無願者以有爲故不願求。論云無願收六行者唯於有漏生死法不願求故。無相八行以通無男女及有漏相故名無相。故收八行卽滅道下各四行。此中且會無願無相各二重。一有漏無漏重。二有爲無爲重。如前思準前見修。法師取三十卷文云無願唯六行。言等者於內等未必等。取道下四行卽與五十五同。若爾無相攝滅四。無願攝前六道下四行卽無所收。義曰道下四行無法收。無十相故名無相。道下行有生滅法非無相。有漏諸法名界繫是生死界無願求不希生死名無

願道下四行非有漏界繫非無願故無法收。義出多端何勞一準問會問。此中斷惑如六十九十智中如五十五鈔會用空無我卽通四諦。空行應攝十六行以徧諦故。正智具不具。法師云正智唯有空行觀無餘二行觀。大師若以正智義說亦具三解脫門別作非正智故。大論解外五法中若以解脫門言之則出世正智所攝。又釋此文或約緣諦別觀故亦是出世正智。問思之依大論二十八云。有有二種謂有爲無爲。於有爲中見過患故無所祈願。依此建立無願解脫門於無爲中建立無相

門若約此文苦集道合十二行皆無願會正法約
總語又說不說空以空惑故大疑問顯揚第二卷
論云空行攝苦下二卽二我不可得無相擇滅可
得無願謂苦二及因集生緣又云空道作道下四
此亦是空行無願作道四行亦無願行無相作道
四行亦無相行若無差別總名空無相無願者此
通聞思修所生之慧世及出世若名空無願無相
三摩地者唯是修所生慧通世出世若名空無相
無願解脫門此唯出世應知且以義思道下四言
通三門者此非空行緣無我等道此謂緣空行等

之道以重空解脫門故顯揚中空行攝二無我卽
徧四諦空若十六行還攝二行二行下文不論明
知不在空行中收無相收滅四及二無我性此謂
緣諦下眞如是非十六行若十六行唯緣滅四無
願緣有爲不斷惑不徧緣四諦唯有六行道下四
行緣道者不出三空之心是故道下四三門皆收
隨彼行相收故不緣三空之道者此中不論此中
卽重三門也以此義道下行無相無願等不收者
此論三門合云細尋思卽知無疑

大乘阿毗達磨雜集論述記卷第二十三

